

四庫全書

集部

欽定四庫全書

集部

宋元詩會卷五十三

四

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣王鍾泰

謄錄監生_臣史元善

欽定四庫全書

宋元詩會卷五十三

兵部主事陳焯編

劉壘

南豐人號水邨宋亡有忠義
集以詩補史紀殉難諸公

補史十忠詩

知潭州湖南安撫使李公希

三已甘退休十連起遲暮伊誰急求子流落乃不怒黑

雲來如山殺氣震平楚恭惟君父命封疆以身護閭門
義不辱呼卒汝善處飛魂隨劍光自己投火去天泣鬼
神愁地搖山嶽仆吾非莒柱厲敢以死醜主正自常事
耳命義逃安所冲遠誰與儔睢陽有張許

池州通判權州事趙公

外發昌州人妻雍氏

若人作何狀立節乃殊偉人言此蜀珍位卑名未起坐
分秋浦月攝此千里寄沙頭風色惡寒城凜弘峙吾聞
開闢迎棄遁亦復恥茲惟城郭臣大義吾知已間道走

帛書灑血別玉季細君絕可人雙飛同一死南八彼男
兒此婦乃如此骨朽香不廢吾詩當青史

丞相都督信國公文公

天祥

時平輒棄置事迫甘前驅嗚呼忠義臣匪直科目儒江
寒朔吹急列城同一趨豈不寄便安綱常乃當扶移檄
倡諸鎮奮袂躬援枹川決莫我回萬險棲海隅天乎復
不濟道窮竟成俘一死事乃了吾頭任模糊悠悠譏好
名責人無已夫三衢有魁相投老作尚書

謂留夢
炎也

參政行丞相事陸公

秀夫

天地無託足海天同隰光明知復何為不忍隳三綱裸
薦覬少延謳歌寧遠亡或者莒在齊聊且帝一方竭蹶
竟委頓臣謀非不臧運去天莫留力盡心彌強終不負
吾主名義天地長懷璽隨龍遊舉室水中央斯人文華
士乃爾百鍊鋼機雲儻通譜應羞朝洛陽

前左丞相江文忠公

萬里弟萬頃

匡廬雲錦屏鴻儒產其下風神儼如龍天矯莫可駕卷

懷經濟具婆娑洛中社怪事玉牀搖清晝天忽夜突騎
從何來陰風飄屋瓦大臣義有死欲避吾不暇庭前環
止水萬事付一捨從容友靈均朝野動悲吒愍章極哀
榮汗簡誰記者倘有南董書季方足堪亞

江西制置司都統密公傳

臣有致身義豈計官崇卑偏將知死忠不曰天下奇漢
節既披靡失位趨江西間帳駐臨汝招徠樂其歸雪寒
南浦愁羽檄斬濟師一將奮風虎鼓行亟颺馳踰嶺疾

戰苦裏瘡呼健兒坐縛膝不屈伏鑕甘如飴小臣裨校
耳職也宜死綏廬州大將在白首豎降旗

淮東制置使知揚州李公

庭芝

淮海接風塵何乃似鐵壁卧護有天人十載藉福力重
來人未老愁絕事如昔苦戰孤城危痛哭天柱折夢遊
三山上人倫浮海出突圍志南征吾欲重建極天弗鑒
忠臣冥冥墮叢棘先軫面如生萇弘血化碧臣死誰復
知臣忠終不易一將更大事嚼舌死罵敵

樞密閩廣宣撫使陳公

文龍戊辰狀元

淳熙名宰孫比德粹如玉決科魁羣英駸駸薦冠肅顙
田煩諫疏相嗔俄嗾逐補郡仍免歸黃流已漫陸天族
日光薄力疾支顛覆蹉跎南冠繫道病死不辱往昔五
峰堂傾蓋語跋燭斯人真偉人哀哉慳厚祿長揖丙辰
魁各天並黃鵠不有二忠存千古笑科目

少傅樞密使張公

世傑

士有守節死豈以責武夫武夫尚能奇消得銀管書何

許熊虎英鐵面美髯鬚護塞久枕戈赴難甘殞軀金山
定活著志願嗟違初江心集羣策炎精回一噓間關障
海嶺萬死存趙孤時也可奈何北風散檣烏漂漂竟何
之無乃膏鯨魚渭濱多貴將反笑斯人迂

四川制置使知重慶府張公

珏

坤維拓提封形勝古天府血戰五十秋零落餘八柱江
南傳箭急誰暇此回顧落日古渝城杖鉞乃甚武天東
甌雖墮吾自強支拄渡瀘躬討逆歸來戰彌苦蕭條下

夔門機穽伏中路咄咄快敵仇誰歟掩坏土哀哉關西
雄國亡猶不負同時督軍將腰金插雙虎

許月卿

字太空婺源人幼從考亭門人遊又受學魏鶴山
勵志操行才足經世舉進士授司戶叅軍率三學
訟權相史嵩之不報官府學教授再上書忤執政
幾蹈不測會執政免得畱稍遷提舉江西常平厯
浙西運幹召試館職又忤賈似道罷歸宋亡屏居
一室閤墨不言者幾十年而卒其大節固無愧文
謝云

京城看月

幾千萬里碧琉璃中有一圓光照之更無一物可與對
部勒星宿光陸離憶昔看月大江頭天地中間風吹衣
凡客無緣相賓主獨攜杯酒獨吟詩祇今千門萬戶閉
良夜京華無人知似我清快更有誰故山今宵月更奇
明日懶人真箇歸

題明皇貴妃上馬圖

開元天寶號太平快活三郎偏縱情帝閑天驥雲雷駛
回首絕憐妃子醉海棠酣春睡未足扶上馬時顏山玉

二璫兩邊扶蹋鞮羣姬爭扶不用命萬花叢玉山花花
朝王醉牡丹共立馬前黃幡綽獻笑容顏似嘲嗔三郎
勒馬頻回頭兩手按膝雙凝眸夾立兩旁御弓箭帶御
器械如行殿二璫相語儼相向貴妃未至龍顏望龍顏
不怡吾曹憂昵昵私語雙燕秋御前兩驥立仗俟御龍
整暇聊緩轡卷中何止數十人十人眼只在一身朕能
墜馬替妃子不忍花飛驚玉體三郎但念妃子醉豈知
身醉誤國事無鹽為后能彊齊夙夜警戒雞鳴詩花鈿

安得紛委地馬鬼安得有墜時

雲邊

雲邊人種麥天際客歸舟
月色輕寒夜笛聲何處樓
人晴人渴雨倦仕我思休
高士傳間看東籬花正幽

同滕推遊朱緋堂

當日朱緋夢荒烟化鶴城
斜陽邊草色深樹裏禽聲欲
雨路微濕出雲山半青
神遊應故里只欠愛翁亭

捧硯姬空翠 二首

捧硯姬空翠隨琴鶴曉烟夕陽更山外流水自樓前芳
草垂楊地和風麗日天戲遊看處處明媚自年年
看山車放慢過水馬爭先須信一年景無如三月天露
花如此好烟樹十分圓客醉不須去竹牀相對眠

次韻雲岳

權輿於我屋渠渠久敬如君世莫如明月清風詩滿案
好天良夜酒連車樽前遠韻輕盈菊醉後分題爛熳書
凡此坐中人十九釣樞玉帶客金魚

追賦暮遊

余以庚子冬離廣陵將肄奉常試業於京師舟泊無
錫日已暮與王希聖微服遊南禪蓋訪古也參寥題
名壁無恙寺記有碑碑陰結字甚偉視之蔡京也出
門烟樹蒼然數僧偶語而已余與希聖却立四顧曰
此佳景也當寫之為詩而舉子業亂其中不能就暇
日追想宛在其目因賦寄希聖其明年冬十一月也
歲月驅人又可一慨

錫山舟泊似荒村微服南禪古跡存壁上姓名今已遠
碑陰人物了能言薄遊草草月侵岫遠思悠悠風滿軒
攜手出門烟樹密數僧離立語黃昏

滿城風雨近重陽

滿城風雨近重陽一舸煙波入醉鄉心事已同鷗鳥白
眼界空有雲山蒼酒安能管興亡事菊亦頗復時世粧
何似長歌明月裏月明天濶地更長

春日閒賦

數行竹樹鳴春雨一簇人家帶曉煙省事山丹自籬落
親人海燕並庭簷樓高思遠天無極酒罷歌闌月正圓
新茗一甌香一篆與君清坐看風簾

何夢桂

字巖叟淳安人咸淳乙丑第三人及第判台州軍
事累遷大理寺卿移疾歸入元屢徵不起杜門學
易自號
潛齋

擬古 三首

生為結髮婚死為同穴鬼豈意冰上綠淪沒隔萬里半

鏡隨塵沙嫁衣在巾笥紅絲倘未絕白首尚歸止心隨
碣石雲淚落銅盤水雲飛會南來水流還北注此生不
可期心期最來世

萬馬蕭蕭來萬矢的的鳴蛾眉逐羈馬淚盡眦血零偷
生愧夫天寧死化鬼磷昭質誓不污九死志靡徵紅玉
隨劍光晶熒貫列星遺骸葬螻蟻冢墓高媧陵

封狼邈萬里風雪饒陰山地荒走蛇豕俘繫去不還高
門誰氏子受驅收猥獫去時紉袴敝羶毳不蔽寒夜夜

望北斗不逐南箕旋父母生我初拊我掌股間豈意越
在茲撫身空自憐

愚石歌

大塊初分生怪石曾與不周山作骨山崩地缺天柱摧
片石耆姿轉奇崛媧皇煉石補天工化作五星成五色
地下為石天上星頑質變化生神靈一朝天狼齧蝕五
星隕隕石宋野猶有光晶熒何人夜負入海嶼錯雜昆
吾無覓處中間塊石獨嵌嵌住在錦溪溪上澣石潤可

以硯石紋可以屏蟲鼠或剗鼎廉粟或剗銘不然雲母
與紫英否則丹砂和空青爾材於用百不適空有千尺
高稜層暴流沒馬不加減霜降石出不加增火不焦水
不凝刻桐扣不鳴飲羽射不驚世間至智不能化而我
安敢逃愚名人聞愚惡聞智喜君謂我愚真知己築室
招子願結交更請柳溪作愚記

寄王南叟寓江鄉

歌盡驪駒落日寒相思無處問平安客愁白髮三千丈

世路青泥百八盤
夜月梅花頻入夢
秋風菰米強加餐
高山如故絲絃在
懶向旁人取次彈

弔維揚瓊花

雙鶴揚州問故家
一樽后土弔瓊花
人間驚破霓裳舞
天上徵回玉女車
死蘄記曾霑雨露
落英誓不污泥沙
後庭玉樹今誰主
猶得臺城葬麗華

丁亥清明和昭德姪孫韻

風吹苦棟結輕寒
乾石青精屋半間
潑火雨收春樹綠

踏青人出畫簾閒紅顏白髮悲歡事舊日新年夢覺關
滿地落花啼鳥急天涯遊子幾時還

招隱 二首

別後頻驚束帶寬相逢亦復笑蒼顏祇今歲月青牛老
何處烟波白鳥閒千古心期寒綠綺十年世事墮黃間
脩簑倚徧空江暮枉殺招呼費小山

回頭五十九年非千里乘風翼倦飛門外黃塵時事改
樽前白髮故人稀金河沙煖春鴻去朱雀橋空海燕歸

惟有嚴陵灘下路年年潮水上漁磯

李郎中有詩謝寄藤杖仍次韻答之

海南覓得古藤枝持與詩人杜牧之
紫貝斑文鞭更爛
赤龍蒼骨蛻尤奇
路無夷險終全節
用有行藏一任時
非但與君扶脚力
鏃蛟刺虎要支持

和酈僉事見寄韻

詩書無用戲侏儒
兩序今猶見壁圖
末路弟兄知己少
中原人物似君無
曲終湘水絲繩絕
書入昭陵筆硯蕪

珍重江南春信早暗隨梅萼到西湖

挽寧谷居士何公

鼠遶枯藤齧未休得如此老死何求翁踰八十媼黃髮
孫見曾玄兒白頭身世幅巾歸繭室歲時盂飯灑孤丘
百年心事無人識分付黃花滿地秋

感寓二首

西風落日怕登樓倚徧關千萬古愁哀漢竟成三國誤
秣陵不改六朝羞江山有恨畱青史天地無情送白頭

擊碎唾壺歌不盡荒臺殘雨夢揚州

試向昆明問劫灰幾看麋鹿上蘇臺閒中歷日生青草
夢裏乾坤化大槐塞雁南歸春又去江潮東下暮還來
臨平山盡啼鵑歇可是征人喚不回

挽太學正節先生徐應鑣

國破君亡一死宜絕憐兒女死如飴龍池竟負媯皇誓
蛙坎空遺烈士悲洗骨不污唐六館瀝心無愧趙孤兒
北行多少生還客休向梯雲讀墓碑

題川無竭寄傲窗

南山有路滑如苔
多少人從半嶺回
不是老僧空傲世
世人自不上山來

贈雲菴董道人

一塢寒雲暝不開
茅簷低壓半蒼苔
近來雲出不成雨
莫遣無心出岫來

汪元量

字大有錢塘人以善琴事謝后王昭儀宋亡隨三
宮入北庭久之請為黃冠南歸幼主與王昭儀及

諸降臣皆有詩餞之自是往來江湖無定跡所作詩皆紀亡國降元之事詩而無史與所南鐵函長存天壤可也元量別號水雲其詩為水雲集

北征

北師有嚴程挽我投燕京挾此萬卷書明發萬里行出門隔山嶽未知死與生三宮錦帆張粉陣吹鸞笙遺民拜路傍哭號皆失聲吳山何青青吳水何泠泠山水豈有極天地終無情回首叫重華蒼梧雲正橫

幽州除夜醉歌

燕姬壓酒春宵永列炬搖光拂紅影銀鴨香烘雲母屏
綺窗繡閣流芳馨晚管聲含蘭氣嬌鳳釵拖頸烏雲飄
錦瑟無端促絃急纖娥歛翠翻成泣雕龍啁哳雞鳴早
一笑紅顏鏡中老

夷山醉歌

二首

楚狂醉歌歌正發更上梁臺望明月西風獵獵吹我衣
絕代佳人皎如雪槌羯鼓彈箜篌烹羊宰牛坐糟丘一
笑再笑揚清謳遙看汴水波聲小錦纜忘還事多少昨

日金明池上來艮嶽淒涼麋鹿遶麥青青黍離離萬年
枝上鴉亂啼二龍北狩不復返六龍南渡無還期金銅
淚迸露盤濕畫闌桂柱酸風急鳩居鵲構蒼隼入蛇出
燕巢白狐立東南地陷妖氛黑雙鳳高飛海南陌吳山
日落天沈沈母子同行向天北關河萬里雨露深小儒
何必悲苦辛歸來耳熱忘頭白買笑揮金莫相失呼奚
奴吹簫簾美人縱復橫今夕是何夕楚狂醉歌歌欲輟
老猿為我啼竹裂

嗚呼再歌兮花滿臺好月為我光徘徊人生在世不滿
百紛華過眼皆成灰夷山青青汴水綠西北高樓咽絲
竹美人十指纖如玉為我行觴歌一曲含宮嚼徵當窗
牖露脚斜飛濕楊柳就有客話陳橋如此山河落人
手客且住聽我語楚漢中分兩丘土七雄爭戰總塵埃
三國鶯花浩無主咸陽宮殿不復都華清池沼溫泉枯
世間興廢奔如電滄海桑田幾回變人生得意且盡歡
何須苦苦為高官人生有命且行樂何必區區歎牢落

遮莫金章與玉珂何如桐江披釣蓑遮莫貂蟬貴此身
何如柴桑漉酒巾君不見海上看羊手持節饑來和雪
扣羶齧又不見飯顆山頭人見嗤愁吟痛飲真吾師美
人勸我酒有客有客聽我歌須臾客醉美人睡我亦不
知天與地嗚呼再歌兮無人聽月自落兮酒未醒

孫殿帥從魏公出師

我宋麒麟閣功當向上名出師休背主誓死莫偷生社
稷逢今日英雄在此行勿為兒女態一笑欲傾城

杭州 二首

有客回陽九無人握髮三關中新約法江左舊清談鐵
騎來天北樓船過海南一枝巢越鳥八繭熟吳蠶

天也今如此人乎可奈何臺邊西子去宮裏北人過玉
樹歌方息金銅淚已多旌旗遮御路舟楫滿官河

杭州雜詠和林石田 十二首

石田林處士唵鏡靜無塵亂後長如醉愁來不為貧飯
蔬畱好客筆硯老斯人近法秦州體篇篇妙入神

先生忘富貴久客幸平安
髮已千莖白心猶一寸丹
衣冠前進士家世舊郎官
醉入烏程里吟登李杜壇

蠋也吞聲歿潛行到水頭
人誰包馬革子獨取羊裘
北面生何益南冠死則休
百年如過翼撫掌笑孫劉

一春雲幕幕三月雨淋淋
魚菜不歸市鶯花空滿林
人行官巷口兵族御街心
老子猖狂甚猶歌梁父吟

躡足封韓信剖心真比干
河山千古淚風雨一番寒
世指鹿為馬人呼鳥作鸞
江頭潮洶洶城脚水漫漫

吟身春共瘦獨立望江亭
越水荒荒白吳山了了青
軍降欣解甲民喜罷抽丁
拍碎欄干曲吞聲血淚零

陵廟成焦土宮牆沒野蒿
亡秦皆趙李佐漢獨蕭
曹國子乘黃貴山人衣白
高飛埃猶黯黯逝水正滔滔

靜看縱橫士翻成買賣兒
禁中驚戰鼓城上出降旗
魏操非無漢唐高不有隋
從茲更革後寧復太平期

偶出西湖上新蒲綠未齊
攜來鰕縮項買得蟹團臍
問酒入新店喚船行舊堤
亂離多殺戮水畔幾人啼

日月往來轂乾坤生殺機江春蛟妾舞塞煖雁奴歸送
客詩添債愁城酒破圍如何秦相國昨夜酖韓非

世變摩訶曲時更短後衣魏庭翁仲泣唐殿子孫非樹
禿鴉爭集梁空燕自歸斷橋春已莫無限柳花飛

竟夕柴門掩無心接縉紳山中多樂事世上少全人諸
呂幾亡漢商翁不仕秦柴桑深僻處亦有晉遺民

太皇謝太后挽章 二首

笳鼓喧吳越傷心國破時雨闌花洒淚烟苑柳顰眉事

去千年速愁來一死遲
舊臣相弔後寒月墮臙脂
大漠陰風起羈孤血淚縣
忽聞天下母已赴月中仙
哀樂浮雲外榮枯逝水前
遺書乞骸骨歸葬越山邊

江陵

月到荆江上輕帆莫遠揚
水搖龍影動風送雁聲長
北斗回秋柄南辰耿夜光
徘徊舒一嘯詩興落瀟湘

錢塘

躑躅吞聲淚暗傾
杖藜徐步浙江行
平蕪古路人煙斷

綠樹新墟鬼火明事去玉環沈絕域愁來金盃出佳城
十年草木都麋爛畱得南枝照淺清

酬王昭儀

愁到濃時酒自斟挑燈看劒淚痕深黃金臺愧少知己
碧玉調高空好音萬葉秋風孤館夢一燈夜雨故鄉心
庭前昨夜梧桐語勁氣蕭蕭入短襟

御宴蓬萊島

曉日重闌對晁旒內家開宴擁歌謳駝峰縷割分金盃

馬乳時傾泛玉甌禁苑風生亭北曲寢園月轉殿西頭
山前山後花如錦一朵紅雲侍輦遊

潼關

蔽日烏雲撥不開昏昏勒馬度關來綠蕪逕路人千里
黃葉郵亭酒一杯事去空垂悲國淚愁來莫上望鄉臺
桃林塞外愁烟起大漠天寒鬼哭哀

石頭城

石頭城上小徘徊世換僧殘寺已灰地接汴淮山北去

江吞吳越水東來健魚奮鬣隨蛟舞快鶻翻身獵雁回
一片降旗千古淚前人留與後人哀

揚州

重到揚州十載餘畫橋雨過月模糊后皇廟裏花何在
煬帝堤邊柳亦枯陂麥青青嘶亂馬城蕪冉冉落羣烏
人生聚散愁無盡且小停鞭向酒壚

長沙

洞庭纔過浪猶高河伯欣然止怒濤傍岬買魚仍問米

登樓呼酒更持螯
湘汀暮雨幽蘭濕
野渡寒風古樹號
詩到巴陵吟不得
屈原千古有離騷

湖州歌

七十
四首

丙子正月十有三
撾韓伐鼓下江南
皋亭山下青烟起
宰執相看似醉酣

萬馬如雲在外間
玉階僊仗罷趨班
三宮北面議方定
遣使皋亭款伯顏

殿上羣臣嘿不言
伯顏丞相趣降箋
三宮共在珠簾下

萬騎虬鬚遶殿前

謝了天恩出內門
駕前喝道上將軍
白旄黃鉞分行立
一點猩紅似幼君

一箇吳山在眼中
樓臺疊疊間青紅
錦帆後夜烟江上
手抱琵琶憶故宮

北望燕雲不盡頭
大江東去水悠悠
夕陽一片寒鴉外
目斷東西四百州

十數年來國事垂
大臣無計逐時挨
三宮今日燕山去

春草淒淒上玉階

錦帆高揭繡簾開
鼙鼓聲悲鳳管哀
月子纖纖雲裏見
吳江不盡莫潮來

一出宮門上畫船
紅紅白白艷神僊
山長水遠愁無那
又見江南月上絃

太湖風起浪頭高
錦柁搖搖坐不牢
靠著篷窗垂兩目
船頭船尾爛弓刀

昨夜三更淚濕腮
伍胥何事夢中來
三宮從此相分別

自勒潮頭白馬迴

受降城下草離離寒食清明只自悲
漢寢秦陵何處在
鶯花無主雨如絲

金陵昨夜有降書更說揚州一戰輸
淮北淮南清未了
又添軍馬下東吳

鐵甕城頭馬亂嘶金陵城下砲如飛
黑風捲地鼓鼙急
昨夜常州又受圍

曉來宮櫓去如飛掠髮鬟雲淺畫眉
風雨淒淒能自遣

三三五五坐彈碁

曉鬢翦鬆懶不梳忽聽人說是南徐手中明鏡拋船上
半揭篷窗看打魚

京口沿河賣酒家東邊楊柳北邊花柳搖花謝人分散
一向天涯一海涯

一片淮山落照中開船忽遇打頭風行軍元帥傳言語
別撥官軍下浙東

不堪回首淚盈盈萬里淮河聽雨聲莫問萍蘆併豆粥

且餐麥飯與魚羹

宰執連鑣向北行
淮西夜夜鬼燈青
雖然適意無南北
生死難逃節下星

兩淮極目草芊芊
野渡灰餘屋數椽
兵馬渡江人走盡
民船拘斂作官船

宮人清夜按瑤琴
不識明妃出塞心
十八拍中無限恨
轉絃又奏廣陵音

清天澹澹月荒荒
兩岼淮田盡戰場
宮女不眠開眼坐

更聽人唱哭襄陽

翠鬟半蹕倦梳妝
楊柳風前陣陣涼
絃索懶拈縮纖手
龍涎猶嚼口脂香

鳳管龍笙處處吹
都民歡樂太平時
宮娥不識興亡事
猶唱宣和御製詞

丞相催人急放舟
舟中兒女淚交流
淮南漸遠波聲小
猶見揚州望火樓

一半淮江半浙江
怒潮日夜自相撞
揚州昨夜軍書至

說道淮安未肯降

曉來潮信暫相畱
滿耳驚濤愁復愁
月殿不知何處在
錦帆搖曳到揚州

九尺瓊花一夜開
無雙亭曲小徘徊
可憐后土空祠宇
望斷韋郎不見來

兩淮戰鼓不停撾
萬騎精兵賽夜叉
破陣焚舟彈指頃
南人猶懼夏爺爺

官軍兩岸護龍舟
麥飯魚羹進不休
宮女垂頭空作惡

暗拋珠淚落船頭

太皇太后過江都遙指淮山是畫圖拋却故家風雨外
夜來歸夢遶西湖

蘆荻颼颼風亂吹戰場白骨暴沙泥淮南兵後人烟絕
新雨燈前醉玉妃

篷窗倚坐酒微酣淮水無波似蔚藍雙櫓咿啞搖不住
望中猶自是江南

銷金帳下忽天明夢裏無情亦有情何處亂山可堆骨

暫時相對坐調笙

絲雨綿雲五月寒淮堧遺老笑儒冠行軍元帥來相探
折送駝峰炙一盤

使臣開閤過高郵楊柳絲絲拂去舟宮女推篷猶自笑
閒拋金彈打沙鷗

邵伯津頭閘未開山城鼓角不勝哀一川霞錦供行客
且掬荷香進酒杯

北風吹雨入蓬間宮女腰肢瘦怯寒阿監隔船相借問

計程今日到淮安

寶應城南柳數株
葭牆艾席是民居
眼前境逆無詩興
忽有小舟來賣魚

船泊邳州古岬傍
斜風細雨送昏黃
美人一一船中坐
猶把金猊注好香

徐州城上覓黃樓
四壁詩章讀不休
更欲登臺看戲馬
州官攜酒共嬉遊

歌風臺畔水沄沄
地面官人餽酒葷
宮女上船嬉一霎

不禁塵土污衣裾

新濟州來舊濟州柳門西畔兩三鷗
酒邊笑謔消長日
弄竹彈絲盡勝流

琵琶切切更嘈嘈高柳羣蟬逐不號
一片夕陽無限好
汶河西上酒樓高

錦帆百幅礙斜陽遙望陵州里許長
車馬爭馳迎把盞
走來船上看花娘

兀兀篷窗坐似禪景州城外更淒然
官河宛轉無風力

馬吏驢拖鼓子船

船到滄州且少畱客來同上酒家樓沿河樹折棗初剥
滿地藤枯瓜未收

日中轉柁到河間萬里羈人強自寬此夜此歌如此酒
臨安月色好誰看

長蘆轉柁是通津盡是東西南北人日暮煙花簫鼓鬧
紅樓爛醉楚州春

恰到揚邨舊馬頭北風吹雨便成秋嗚嗚鬼物敗人興

掩却篷窗且睡休

滿朝宰相出通州
迎接三宮宴不休
六十里天圍錦帳
素車白馬月中遊

會同館裏紫蒙茸
蘭麝飄來陣陣風
簫鼓沸天迴雁舞
黃羅帳幔燕三宮

皇帝初開第一筵
天顏問勞意綿綿
大元皇后同茶飯
宴罷歸來月滿天

第二筵開入九重
君王把酒勸三宮
駝峰割罷行酥酪

又進椒盤剥嫩蔥

第三筵席在蓬萊丞相行杯不放杯割馬燒羊燉解粥
三宮宴罷謝恩迴

第四筵開在廣寒葡萄酒釀色如丹并刀細割天雞肉
宴罷歸來月滿鞍

第五華筵正大宮轆轤引酒吸長虹金盤堆起綿羊肉
樂拍三千響碧空

第六筵開在禁庭蒸麋燒鹿薦杯行三宮滿飲天顏喜

月下笙歌入舊城

第七筵排極整齊三宮遊處輒輿提杏獎新沃燒熊肉
更進鷓鴣野雉雞

第八筵開在北亭三宮豐燕已恩榮諸行百戲都呈藝
樂局伶官叫點名

第九筵開進帝妃三宮端坐受金卮須臾殿上都酣醉
拍手高歌舞雁兒

第十瓊筵敞禁庭兩邊丞相把壺瓶君王自勸三宮酒

更送天香近玉屏

一人不殺謝乾坤萬里來來謁帝閣高下受官隨品從
九流藝術亦沾恩

僧道恩榮已受封上庠儒者亦恩隆福王又拜平原郡
幼主新封瀛國公

金屋妝成物色新三宮日用御厨珍其餘宮女千餘箇
分嫁幽州老斲輪

每月支糧萬石鈞日支羊肉六千斤御厨請給葡萄酒

別賜天鵝與野麋

三宮寢室異香飄
貂鼠氈簾錦繡標
花毯褥裯三萬件
織金鳳被八千條

客中忽忽又重陽
滿酌葡萄當菊觴
謝后已叨新聖旨
謝家田土免輸糧

三殿加餐強自寬
內家日日問平安
大元皇后來相探
特賜絲紬二百單

萬里脩途似夢中
天家賜予意無窮
昭儀別館香雲煖

自把詩書授國公

江南罷守列金階內裏華筵日日排
文武官僚多二品還鄉盡帶虎頭牌

四川督帥尚麤豪萬馬來燕貢一遭奏
授虎符三百面內家更賜織金袍

曉望燕雲正雪天閉門氍毹帳恣高眠
內家遺鈔三千錠添賜三宮日用錢

越州歌

十首

淮南四畔草離離萬檝千艘水上飛
旗幟蔽江金鼓震
伯顏丞相過江時

東南半壁日昏昏萬騎臨軒趣幼君
三十六宮隨輦去
不堪回首望吳雲

西峰雲鎖幾時開昨夜京城戰鼓哀
漁父生來載歌舞
滿頭白髮見兵來

魯港當年傀儡場六軍盡笑賈平章
三聲鑼響三更後
不見人呼大魏王

脫却黃袍心莫欺
魏王事業止于斯
孤舟走過揚州去
表奏朝廷乞太師

賈廟巍巍盡勅封
秦齊兩國受恩同
木綿菴下無依鬼
合策麒麟第一功

羣臣上疏納忠言
國害分明在目前
只論平章行不法
分田之後又私田

甲子初秋柳宿乖
皇天無雨只空雷
正當七月初三夜
帝勸長星酒一杯

月夜湖歌歌正長船來船去水茫茫上塘歌了下塘唱
更唱吳王與越王

苦夢吳山列御筵三千宮女燭金蓮而今莫說夢中夢
夢裏吳山只自憐

醉歌十首

呂將軍在守襄陽十載襄陽鐵脊梁望斷援兵無信息
聲聲罵殺賈平章

援兵不遣事堪哀食肉權臣大不才見說襄樊投拜了

千軍萬馬過江來

淮襄州郡盡歸降
鞞鼓喧天入古杭
國母已無心聽政
書生空有淚成行

六宮宮女淚漣漣
事主誰知不盡年
太后宣傳許降國
伯顏丞相到簾前

亂點連聲殺六更
熒熒庭燎待天明
侍臣已寫歸降表
臣妾簽名謝道清

衣冠不改只如先
闕會通行滿市廛
北客南人成買賣

京城依舊使時錢

北師要討撒花銀官府行移逼市民丞相伯顏猶有語
學中須揀秀才人

湧金門外雨晴初多少紅船上下趨龍管鳳笙無韻調
却撾戰鼓下西湖

南苑西宮棘露牙萬年枝上亂啼鴉北人環立闌干曲
手指紅梅作杏花

伯顏丞相呂將軍收了江南不殺人昨日太皇請茶飯

滿朝朱紫盡降臣

戎州 三首

錦荔戎州第一奇
大如雞子壓枝垂
金刀剪下三千顆
對客從容把酒卮

害馬勞生事已灰
長安無復使人來
滿園蒼蔚千千樹
盡是楊妃死後栽

錦殼中間玉一團
樹高數丈實難攀
瀘戎顆顆甜如蜜
變梓纍纍味薄酸

鳳州歌

去路迢迢入兩當三千三百到華陽
黃花川上黃花驛
千百猿聲斷客腸

宋元詩會卷五十三

欽定四庫全書

宋元詩會卷五十四

兵部主事陳焯編

熊銖

號勿軒建陽人為寧州司戶參軍入元不仕老而
好學所著有翰墨全書行世按元文類中有熊
銖者亦係閩人其著作多屬大德至大間
距宋亡三十餘載恐非勿軒當再考之

遊武夷山

我來武夷山遠意起千古嘗疑混沌開
疏鑿未經禹峽

山猶古梁洪濤莽回互行舟留大壑營巢餘斷樹根崖
波濤痕隱隱皆可覩陶然上古民要服固深阻秦威何
桓桓薄海猶廣土六合皆涕沸一枝豈寧處嘗言十三
君隱隱避秦侶一日厭塵寰冷然遂高舉上山娛賓雲
下山滿豺虎神仙何渺茫虹橋想虛語桃源亦其類好
事自誇詡風氣日已開蛇斷出真主遂令閩山陬盡入
職方宇漢志名始彰祠堂用魚脯流傳世代久琳宮繁
衣羽至今此名山號為神仙府

上致用院李同知論海舶

易經致民用肇自羲農先耒耜既生聚市易還懋遷公
私不交病本末無倒縣古人致主術稱物匪有偏厥初
禹作貢不但中邦田四海自錫貢寧憚來徃邊碣石來
冀右海岱青徐連東南並淮揚亦自江海沿夫豈寶遠
物有道歸陶甄成周制國用半在周官編虞衡與商賈
胡不末利捐艱難開國心什一猶欲蠲裒益固有道公
功格皇天後儒不知學說理多虛玄生財昧大道民命

日益股管商一作俑蠹弊貽千年漁鹽尚抑末奈何誘
開阡懷清一以築甿獨堪哀憐封君擅半賦公私重熬
煎寒機凍女手汗粒賴農肩織衣不上體春粟不下咽
傷哉力田家欲說涕淚漣何如棄之去逐末利百千矧
此賈舶人入海如登仙遠窮象齒徼深入驪珠淵大貝
與南琛錯落萬斛船取之人不傷用之我何愆奈何昧
輕重屑屑窮算鞭錙銖較鷺股漏網魚吞船安得體國
臣為天掘泉源上資國脈壽下拯民瘼瘡朝夕禹貢志

菲食甘腴胼九載不入門千古孰與賢更想公旦心待
旦尤乾乾世俗吝與驕曾不絲毫牽所以太和治常在
虞周前此道久已亡利欲充垓埏豈曰治不及曾是心
無傳名公中州傑自是天分全問學甚充厚願力還精
堅博物功不勞無欲心湛然維此一樞軸實秉大化甄
如天有北斗物物歸璣璇帝念南海民風化舊所宣皇
皇風霜節炳炳奎壁躔纖微亦何浼闔散有大權利用
六府修制用九府圉古人不可作得意皆蹄筌誰哉識

治本理此南熏絃三代事寂寞念之心中痛書生武夷
客偶此來海埂使者採風謠詩歌寓惓惓

寄趙菊東山長

三首

男兒貴神交何必見顏色大江有佳士夢寐不可得忽
來幔亭間片雲亦相識娟娟如在眼猶此一水隔

澹然幽貞姿乃是夕英菊託根九秋杪霜露淒已肅我
疑靈均伴只有淵明獨采采黃金花豈意在林曲

胡為此不采却采泮水芹聖人望魯念彼忝車麟麟餘

澤孟孫氏管商何足論新畬有陳根猶是豈芭春

上嚴廉訪 三首

古人重民教禮樂用為急虞書有三官周典猶二職太
學領奉常西都有餘責兩生既不來何參又無術

漢興歷數世茲事竟未遑一絕不復續千載重慨慷房
魏輔貞觀汗瀋空流漿開寶龔唐陋儀儼負義方

南方尚秉禮文風未云衰釋奠古雅樂鄉飲舊漢儀表
章在正學舍魯將安之願言假良遇制作逢昌時

擣衣曲

北望悠悠音信少空房念遠心常早
流螢煜煜夜稍清塞雁啞啞寒已到
細絲清水練方新在拋半濕日中明
隔籬翁媼寐不熟月落尚聞砧杵聲
將軍錦帳環歌舞百戰仍遲歸寸土
老農肩米肉成瘡思婦裁衣淚如雨
呈劉治中

弱水流西河水東瞻烏爰止誰雌雄
天地方閉何時通顛倒溷室成仙宮
我羨仙人在高空絕粒輕舉乘天風

養不及真神龍人生翦羽樊籠中名尤利怨方相攻
忽聞海上蓬萊翁却來幔亭跨長虹願畱徜徉羣仙峰
塵寰渺渺知何窮

送洛陽靳中事

銅駝巷陌棘風涼尚記東都舊帝鄉甲馬營空雲氣遠
杜鵑聲去洛園荒天開地闢人才出風起雲飛汗竹香
倘得行窩容我老春風借地種姚黃

聞讀書有感

萬疊青山鎖暮陰
倚欄凝竚意深深
起時士女忻秦服
學語兒童解楚吟
當日繁華逐流水
何年拱把秀穹林
遼東俎豆銅川筮
認取斯人萬古心

越川道中

野田秋澗響潺潺
新翠喬林繞舍環
淡日凝烟橫別浦
斜風吹雨過前山
柴扉初放牛羊出
漁艇方攜鱗蛤還
自笑平生愛遊覽
天教長在水雲間

客夜書事

西風涼信入虛簷
絺綌微單已戒嚴
鄉夢不隨秋夜永
客愁偏向雨聲添
清高鳴雁低雲海
漂泊流螢傍竹簾
搔首寒燈樓舍悄
行藏自曉不須占

平江舟中不寐

遠水瀟瀟荻葦風
月明雲外叫孤鴻
丹楓擁被疎篷底
夢斷山深野寺鐘

江邊客舍

輕寒無賴入征裘
野水閒雲總是愁
極目遠山橫靄外

數聲鳴櫓白蘋洲

王 鑑

括之平昌人字介翁宋末官縣尉當祥興播遷時
即解綬歸隱工於吟咏宋史載王鑑文集二十卷
今所傳月洞詩草特豹斑
耳明閩人徐興公極稱之

錢塘江

涼疎萬柳條秋滿石欄橋吳越興亡事晨昏來去潮雲
開天日近水接海山遙望到西陵渡風帆穩自飄

塞上曲

黃雲連白草萬里有無間霜冷羈髀哭天寒甲冑閒馬

嘶經戰地鵬認打圍山移戍腰金印將軍度玉關

馬嘶
一聯

用唐異句
不嫌其同

買舟

赤欄橋上路幾度卜歸期流水無迴日行人有老時潮
來江勢逆月出海門遲風順輕舟駛蒲帆盡夜吹

別虞君集

瓦瓶擔酒去送客石橋東潮過汀沙上船迴島嶼中桃

花三月雨楊柳五更風
明日思君處渡頭烟水空

送默然上人歸天台

孤雲不定心持鉢
度寒林野飯青蒲潔
客程黃葉深
海風潮水發
山雨燒烟沈
歸到石橋日應看瀑布吟

早行

客程因太早却費一更眠
落月已歸海殘星猶在天
櫓聲荷葉浦螢火豈花田
隔岼誰家起青燈遠樹邊

別黃吟隱

飲乾分別酒話久未移舟潮水催行客海山生遠愁蟬
聲秋浦樹雁影夕陽樓今夜相思夢蘆花第幾洲

秋深

風露損衣裾秋深懷古廬僕方談夜夢客至得家書子
黑石蓮老柿紅霜葉疎今年籬下菊遙憶少人鋤

訪瞿梅山

諸老彫零盡江湖今有誰半生行客慣多難識君遲花
屋春風酒梅山雪夜詩莫為名釣出世事正如棋

晚春即事

雲氣不分明
天陰忽又晴
喜涼溪鵲浴
知雨沼蛙鳴
仙藥黃精飯
齋蔬白椹羹
惜春吟未就
閒踏落花行

山中

榮枯皆定數
枉作送窮吟
有色非真畫
無絃是古琴
青松秦世事
黃菊晉人心
塵外烟蘿客
相尋入遠林

避亂柯巖綠坡諸公以詩見寄

柯括地西東
音書久不通
山河隔今古
天地老英雄
局

敗棋難著愁多酒易中
花前多少恨無語寄春風

感秋寄白雲趙寺丞

囊裏不藏金相隨只破琴
每因看月夜長動故人心
敗草關河路秋風楚越砧
愁來不成寐壞壁更蛩吟

谿村

水路隨山轉谿晴踏軟沙
斜陽曬魚網疎竹露人家
行蟬上枯岬飢禽銜落花
老翁分石坐閒話到桑麻

寄友

髮影明寒鏡蕭蕭亦自憐故人難會面行客又經年晴
雪添崖瀑春雲雜燒烟相思有書札寫盡夜燈前

宿香巖院

地爐煨火柏枝香借宿寒寮到上方山近白雲歸古殿
風高黃葉響空廊敲門僧踏梅花月入夜猿啼楓樹霜
夢醒不知窗日上時聞清磬出松堂

寄杜北山

倦客蕭蕭兩鬢秋柳絲無力絆歸舟曉風落葉辭高樹

夜月行人在別州千里關河鄉國夢一江烟浪古今愁
雁聲過盡青天濶却憶同登望海樓

古杭感事

國事彫零佳氣哀東南豪傑竟何之雲寒廢殿排班石
草卧前朝記事碑沙漲浙江龍去遠天寬北闕鳳歸遲
可憐不老吳山月曾照官家寵幸時

山居

屋頭蘚樹蛻鳴蛩池上溝泉鑿石通香老蒲花春洞影

涼生槲葉午窗風
泥瓶開酒留樵客
窮笠穿雲訪藥翁
雖是一貧清似水
定無徭役到山中

暮春寄仙洲舍弟

去年妍菊醉重陽
今日誰知各異鄉
落葉石欄霜信早
敗荷池屋雨聲涼
人情好惡花甘苦
世事榮枯草短長
別有駿鷗雙翮健
剛風摩透入蒼茫

湖山即景次尹綠坡

湖山掩映雁潭秋
今古詩人說勝遊
綠柳影分騎馬路

丹楓葉落釣魚舟前坡風起歸樵笛別墅雲藏賣酒樓
長記尋梅冰雪裏氍毹駝帽鸛鵒裘

尹綠坡山間吟所

苔痕分路見人家犬護籬根臥落花一片林塘詩境界
四時花果隱生涯鋤山揀日春栽藥汲水和雲夜煮茶
耕錄有文須點看旋搖松露入硃砂

寓龍虎山中示張鍊師

蓮盃送別萬峰雲龍虎山前過小春草屨慣穿枯嶺葉

布衣猶帶舊京塵，
檀寒不見遊仙夢。
路遠誰憐倦客貧，
東望海門歸未得。
北風吹雪滿唐巾。

病中

鏡裏初疑看不真，
衰顏只恐是他人。
醫言斷酒方除病，
母戒觀書亦損神。
臥久不知黃葉落，
起來添出白髭新。
自梳頭髮斜陽下，
手脫隨風半禿塵。

春酌

酒闌歌罷翠簾遮，
月柳驚啼子夜鴉。
多少斷雲心上事，

結成香夢是梨花

西湖

南北高峰叫杜鵑斜陽浮翠斷橋邊畫船歸盡江湖夢
一半樓臺楊柳烟

秦望山

祖龍癡欲望長年却遣君房渡海船枉去蓬山覓丹藥
桃源亦自有神仙

深春 二首

夾泥花上燕巢邊翠箔桑空蠶又眠天氣乍晴風候別
坐看盆藕出雙錢

燕子來時春又休暖風吹綠上枝頭繡簾不隔荼蘼月
香影無人自入樓

訪庭植上人

苔侵坐處石頭青滿屋春雲不用扃入定醒來香印冷
一簾花雨濕殘經

宿西上竺

閒收石上著殘棋
山月無聲鶴睡時
落葉打窓霜滿屋
有僧吟得夜寒詩

斷橋春望

拾翠車閒輦路塵
山南山北杜鵑春
誰家庭院東風裏
吹出桃花不見人

漁父吟

竹絲籃裏白魚肥
日落江頭換酒歸
只恐明朝風雪至
老妻連夜補蓑衣

壽光宮

井氣蒸雲濕石欄
虬鬚道士自燒丹
開門風帶琴聲出
一陣松花滿醮壇

裁衣曲

燒罷心香午夜闌
玉纖輕捻剪刀寒
衣成恐不如郎意
獨試燈前照影看

花下作字付葉拓山使者

花蘚層層潤石牀
綠陰多處自生涼
閒將筆染茶蘚露

寫得春詞滿紙香

鄭思肖

字所南別號億翁宋亡僑寓姑蘇忝離之痛一飯
不忘著有心史以鐵函藏承天寺井中至明崇禎
間因淘井得出

避暑入古寺

避暑入古寺暫爾遣騷屑心靜涼於秋倏然適清悅彼
哉誰氏子對奕氣爭傑惜其二低手彼此蔑竒著旁觀
發冷笑連呼錯錯錯救之不可及流視入寥廓

嗟汝二首

嗟汝兒女曹至蠢亦孔醜面笑心搖搖欲進乃却走慙
癡弄盲語捧酒祝鬼壽傷哉復傷哉醒眼頻搔首
偶背垂衣時萬事暗蒼莽詔汝一世人父亡子焉往良
心油然而生千載垂清響與道同周流光明塞穹壤

苦懷

古人立志高為義不為己今人所見卑獨為貧賤恥不
義富貴生寧以餓而死遺體非不重所懼悖於理我稟

清淑氣生而秀為士讀書三十年頗知六經旨質之以
人道所言皆如此奚乃滯風塵爾汝弄歡喜

菊花歌

太極之髓日之精生出天地秋風身萬木搖落百花死
正色與秋爭光明背時獨立抱寂寞心香貞烈透寥廓
至死不變英氣多舉頭南山高嵯峨

題多景樓

英雄登眺處一劍獨來遊男子抱奇氣中原入遠謀江

分淮浙上天濶楚吳秋試望斜陽外誰寬西顧憂

逢陳宜之

行李苦役役相逢古潤州千金一夜醉四海十年遊山
靜鬼行月宵涼人夢秋近聞邊事急畎畝得無憂

越州飛翼樓

飛來絕頂上流盼入無垠國土東南濶山川今古新高
樓臨白日平地載青春直欲蓬萊去因風問大鈞

山中聞鶴

涼夜坐巖石飛來白鶴鳴星流銀彈過月碾玉輪行萬
里思不極一天秋更清欣然有所得長嘯度蓬瀛

聽琴

洋洋盈耳間一派水潺潺意不隨聲盡心應與物閒宿
雲穿竇出飛鳥御風還却喜無人識支頤看遠山

別故人

拍馬又登程餘酣尚未醒曙蟾清淡白秋漢覆空青江
走遊龍勢山蟠睡虎形飄零母感歎天地亦浮萍

詠懷 三首

天命未歸莽大夫空美新三宮猶萬里一念只孤臣淚
盡眼中血心狂夢裏身勿云今已矣舉首即蒼旻
未能歸趙璧我不厭干戈萬古青天在三年白骨多春
風仍歲月世界自山河寧忍委國難飛身入薜蘿

不信夜不曉哀哀鎖暗顰鐵城蹲敗土錦國漲飛塵草
泣荒宮雨花羞悄地春少焉開霽色四望一時新

晚晴

落照開空霽明霞映水鮮
乾文縣造化土脈潤山川
白滿重圓月青還不翳
天定鐘聲更徹通夕喜無眠

即事二首

棲遲破屋下書史自徜徉
道不嫌清苦人皆笑獨狂
晚花虧雨露老樹慣風霜
莫望閭門北愁雲天外長

一說乾坤事無愁鬢亦斑
心飛空濶外身墮亂離間
日落經何國雲歸識故山
憑誰扣冥漠天道幾時還

宿半塘寺

一襟清氣足此夜豈人寰醉影松杉下吟身風露間秋
縣當殿月雲宿近城山明發騎鯨去飄然不可攀

追獎

并序

毛惜惜高郵軍妓也理宗朝榮全據高郵城叛召惜
惜佐酒惜惜怒叱之曰汝本趙官家犍兒何敢反耶
吾有死耳不能為反賊行酒榮全以刃裂其口立命
瘳之

誰謂匪人賤猶懷事賊羞挺身持大義正語叱狂囚名

在春逾艷骨香花不愁有靈知國事地下笑王侯

辛巳歲立春作

大辱痛於死含哀弔歲華
叫雲聲草檄戀闕夢宜麻
地走人形獸春開鬼面花
年年北去婦馬上哭琵琶

夏駕湖晚步懷古

豈獨吳王事可憐人生回首總淒然
空嗟落日猶如夢不記東風幾換年
寶駕跡消前古地菱歌聲斷晚涼船
如今城郭都遷變茅屋荒頽草積烟

送人之行在

歌斷陽關奏暮笳東風吹客向京華三更舟度淞江月
一路春連上苑花地逼星辰黃道近山環宮殿紫雲斜
茲遊歸計須宜早莫遣相思夢遶家

飄零

飄零書劍十年吳又見西風脫盡梧萬頃秋生杯後興
數莖雪上鏡中鬚晴空濶浮雲盡破屋荒涼俗夢無
惟有固窮心不改左經右史足清娛

醉鄉

誰居此域作生涯
偏許劉伶畢卓家
屋影空空天渺漭
燭光閃閃地橫斜
春紅輭玉頰衣樹
秋碧流波漾纈花
接壤或通三島路
任他苦海事如麻

萬里和風眼底回
陶陶樂土隔飛埃
暖浮花思春初透
紅漲霞紋潮正來
長駐童顏驅老去
不教玄鬢受愁催
舉頭閭闔手能摸
更欲乘風過九垓

二礪

愁裏高歌梁父吟猶如金玉戛商音十年勾踐亡吳計
七日包胥哭楚心秋送新鴻哀破國畫行飢虎齧空林
胸中有誓深於海肯使神州竟陸沈

釣天夢冷紫宸春臣子銜哀社稷屯一縷血忱開白日
兩篇心誓哭蒼旻渡江祖逖願興晉蹈海仲連羞帝秦
回首故都宮闕恨滿山秋色正愁人

弔揚州瓊花

并序

揚州瓊花天下惟一本后土夫人司之花之盛衰淮

境豐歉係焉未南渡前經兵火此花亦死今遭大故
丙子歲維揚陷丁丑歲此花又死孰謂草木無知乎
南土新飛劫火灰瓊仙戀國暗驚猜定應撮向天宮種
不忍陷於秦地開花死青春禽鳥哭城埋黑氣鬼神哀
一朝枯枿變高樹傳得歌聲沸似雷

湖上漫賦

蘚厓蒼潤雨初乾石罅飛泉噴雪寒啼斷禽聲山更靜
青松影下倚欄干

絕句二首

閨門城外水涵空
雁影淒涼落照中
一望秋風數千里
不知何處是行宮

草木恩深雨露餘
公卿環列漢庭居
一朝投閣千年笑
却是揚雄不讀書

小春花

天地無情正北風
飛鴻哀咽亂雲中
此時縱使開千樹
不及東皇一點紅

春日 二首

山塘遊舫接荒城縱有笙歌耳不清
深憶國家無事日人心和氣是春聲

曉來怕上最高樓春盡時光只似秋
草木荒寒生意澀風腥雨膩一天愁

劉麟瑞

號如村亦有紀忠詩
附見其里系未詳

忠義總管田公燧鳳守李公實

天西戰士競銜枚乘會關山路始開兩蜀金湯隨水逝
三秦烽火照天來鳳州文武渾無愧馬嶺英靈只自哀
後夜魂歸何處寓隴頭蕭索一枝梅

天水知軍時公當可西和總管陳公瑀

天水西和兩將強七書貯腹負剛腸魚麗陣布刃如雪
馬草屍空骨似霜蘼蘭昔存秦莫敵關張今敗蜀終亡
輕財得士人猶惜長想英風慨智囊

金州守臣和公彥威統制楊公興福

貔貅曾是守饒風
扞拓金房未易攻
十八谷開通徼外
五千兵勁入關中
賀蘭不救睢陽敗
諸葛猶存越雋功
當日更推楊統制
馬傷軍沒箭飛紅

同慶知府李公冲偕死節諸公

諸公耿耿抱精忠
炎運將灰日不東
北戍躡陵羣盜劒
西陲震蕩列城空
香凝燕寢家何在
鼎沸魚遊計已窮
玉石俱焚天亦泣
千年誰為憶高風

援襄都統制張公貴

忠勇堂堂貫斗牛英雄端不愧兜鍪鹿門雲合張羅網
龍尾坡翻化鰲鼉雙廟有靈開正祀孤城無援屹中流
由來死節男兒事却笑明年有客羞

守襄都統制牛公富范公天順

元戎志喜監降幡偏將能知大義存頭觸危樓輕烈焰
脰經孤館凜忠魂聲沈刁斗摧城影塵掩干將滲血痕
世遠事殊遺老盡更無人解說裏樊

沙洋堡裨將邊公居誼

兵威破竹列城驚誰信偏裨不肯迎
兩箭離弦聲霹靂
二雄交斃氣崢嶸可憐侯服微臣在
忍見人間大厦傾
萬木凋零風雪裏空餘鐵樹一花明

丞相江公萬里知府江公萬頃

名重天閭侍太微昔年南國秉樞機
人歸綠野身猶健
兵滿紅塵世已非止水亭前風淅淅
鄱陽城外草依依
棣華相映人間瑞節惠隆名世所稀

宗室趙公崇源

南風不競慘悲聲
幙燕泥牛總是驚
玉牒名香時已逝
金枝花悴本難榮
身明六籍忠仍孝
軍滿孤城死亦生
後度推敲明月夜
江村村外寄幽情

端明招討使汪公立信

如此奇才正可憐
曾陳大計為安邊
天存廟社施籌策
地限藩籬老歲年
獨眼明明尋趙地
丹心耿耿向淮壖
江南寸土聯區脫
慟哭高沙赴九泉

湖南安撫知潭州李公芾

平楚樓頭矢石驚焚香稽首別宸京盡殲妻子期全節
寧死封疆不忍生烟燄張空顏趙壁旌旗倒影下湘城
善刀人在同觀化名與澄江一樣清

江東通判趙公淮妾某氏

石頭城昔號金湯岌岌孤墉戰馬場西日突圍逃漂水
南冠荷校說維揚血凝漢節誇男子身寄秦淮藉女郎
千載妾身貞更潔仰天哭向水雲鄉

沙市監鎮司馬公夢求

荆水滔滔百尺渾何來淺縮漫潺湲木城聯岼風輪吼
沙磧屯雲火炬燔效死小臣懷綠綬偷生天閭愧朱轡
下官名姓君知否涑水先生七世孫

參政高公應松

腸斷吳山錦繡叢六更聲絕海潮空千門鎖月移行在
八駿乘風想會同扈蹕孤臣慙主辱征鞍萬里哭途窮
兩宮緩緩趨朝陞回首天南獨死忠

蜀帥張公珏

玉壘雲浮五十秋，關西虓將勇無儔。
三吳甑甍猶堅守，八柱唇亡不耐愁。
瀘水捷收勞騁褭，夔門機伏失兜鍬。
吾君不負吾寧死，遺恨誰憐快敵讐。

儒士王公士敏

此行無復望生還，畱取哀吟宇宙間。
報國有懷追蜀相，遺民空自戀吳山。
明星箕尾英靈在，斜日桑榆歷數慙。
寂寂園扉終不悔，忠魂莫恨左輪殷。

嗣秀王與擇瑞安守臣方洪

派接天潢本近親更生忠節古無倫
千軍守禦求閩嶠半歲勤王護宋民
巷戰血流生不辱劒飛魂逝世能神
風流喜遇莆城友攜手泉局萬古春

樞密張公世傑

曾擁貔貅奏凱歌厓山雲暝竟蹉跎
地空九有棲荒服寨列千艘保海阿
龍躍壘沈天若此鳥鳴石絕事如何
鯨波沃日炎光熄凜凜英魂尚枕戈

江東制置使謝公枋得

草履麻衣謾蔽形十年賣卜慣零丁願從楚地師龔勝
慙向遼陽友管寧采石吟成期絕粒娥碑讀罷棄餘齡
一門盡節均無愧千載西山疊疊青

美人朱氏

給事中宮已歷年蒙恩扈從赴幽燕賢王索好緣難合
烈婦捐生節已全日晏寢門疑鎖鑰宵長驛館泣嬋娟
同來小婢猶堪詫一樣清風兩地傳

梁隆吉

原名棟鎮江人以字行宋末登第為小官宋亡與其弟入茅山衣道士服登武林鎮海樓題聞角詩得禍幾不測然以是益為有道所稱從遊日衆為遺民三十載一夕無疾卒

淵明攜酒圖

淵明無心雲纔出便歸岫東皋半頃秫所種不常有若恨無酒錢閒却持盃手今朝有一壺攜之訪親友惜無好事人能消幾壺酒區區謀一醉豈望名不朽閒吟籬下菊自傳門前柳試問劉寄奴還識此人否

黃葵

乾坤有正氣間色皆為臣名葩據中央紅紫誰敢鄰傾
日不忘君衛足恐傷身冥然無知識忠孝出本真林林
天地間戴履而為人明靈秀萬物孰不尊君親嗟嗟叔
季後利欲泯天倫邈哉望帝國產此瑞世珍九夏不趨
炎三月不爭春高秋風露冷孤標出清塵背時還獨立
攬芳淚沾巾

久雨有感

少年不學稼老大生理拙入山採黃精窮冬一尺雪虎

狼正縱橫原野有白骨傷心重傷心吾饑何足恤

送李北山歸建康二首

人生無百年胡為在遠道遊子歸故鄉王孫怨芳草有
田歸去來無田歸亦好

貧賤有餓死富貴履危機東海不可漁西山采無薇四
方已一氣我今將安歸

大茅峰

杖藜絕頂窮追尋青山世路爭嶮峻碧雲遮斷天外眼

春風吹老人間心大龍上天寶劍化小龍入海明珠沈
無人更守黃帝鼎有客欲問秦皇金顛崖誰念受辛苦
古洞未易潛幽深神光不破黑暗腦山鬼空學離騷吟我
來俯仰一慨慷山川良昔人民今安得長扛撐日月華
陽世界收層陰一聲長嘯下山去草木為我畱清音

四禽言

不如歸去錦官宮殿迷烟樹天津橋上一兩聲叫破中
原無住處不如歸去

脫却布袴貧家能有幾尺布織盡寒機無得裁可人不
來廉叔度脫却布袴

行不得也哥哥湖南湖北春水多九疑山前叫虞舜奈
此乾坤無路何行不得也哥哥

提葫蘆年來酒賤頻頻沽衆人皆醉我亦醉哀哉誰問
醒三閭提葫蘆

金陵廢宮

六代俄然又一唐青山坐閱幾興亡心知江左非王業

口說中原是帝鄉
落日有時登北固
春風吹夢過錢塘
荆墳檜宅依然在
畱與烏衣話短長

鳳皇臺

白髮久孤鸚鵡杯
碧梧自老鳳皇臺
管夷吾亦僅如許
李謫仙今安在哉
城郭是非秋雨外
江山形勝暮潮來
小畱只等中秋月
且放青冥萬里開

白鷺亭

荻花蘆葉老風烟
獨上秋城思渺然
白鷺不知如許事

赤烏又隔幾何年六朝往蹟秦淮水一笛晚風江浦船
我輩人今竟誰許只堪漁艇夕陽邊

贈嘉興徐同年

憶昔青龍在戊辰馬蹄同踏杏園春歸田令尹空書晉
執戟郎君盡美新萬事不醒中酒聖一貧無奈訟錢神
相逢莫效窮途泣薇蕨山頭要有人

登鎮海樓聞角聲

聽徹哀吟獨倚樓碧天無際思悠悠誰知盡是中原恨

吹到東南第一州

唐涇

字清父道州龍山人
宋亡有江南紀事詩

江南紀事

吳山一髮暮雲孤
愁向湘纍訊故都
鳳去只餘韶樂在
雁來還寄帛書無
登壇有客陳孤注
平隴何人復五銖
歌徹黍離風雨惡
南山深處叫烏烏

閩亡徙東廣

逃泉已矣又姑猶半壁乾坤只恁休頻歲建杓移北斗
何人持節救東甌烟蜚檣櫓風濤怒雲鎖樓臺日月愁
南望羊城天欲暮可堪回首問神州

廣亡徙海


箕冠如櫛擁茅旌誰執驛毛軟晉盟遵海而南關氣數
渡江以北少功名火旗掩靄雲藏闕水陣周遭雪壓城
一榻不容人鼾睡那知霧島是神京

厓山亡

萬里輿圖入朔方
搖搖孤注海之陽
石尤風惡雲藏軫
天駟星沈月掩房
島上有人悲義士
水濱無處問君王
義和指著烏飛路
去去虞淵暮色蒼

讀史懷友

羞登廣武議英雄
匣却吳鉤弢却弓
幕下清談王太尉
門前白馬褚司空
一編袞斧風塵表
千古綱常天壤中
說與華陰捫虱老
何曾正統在江東



宋元詩會卷五十四